

Ingün'antenna 5G i'l clucher a Scuol

Radunanza extraordinaria da la Corporaziun evangelica Scuol-Tarasp

DA BENEDICT STECHER / FMR

■ **A la radunanza extraordinaria sun gnüts orientats ils preschaints davart il proget da la Swisscom per installar ün'antenna da 5G aint il clucher da la baselgia a Scuol. In üna votumaziun consultativa ha decis la radunanza in venderdi passà da na conceder il permiss per üna tal'antenna.** Per la tractanda principala per ün'antenna 5G i'l clucher da baselgia a Scuol vaiva *Peder Rauch*, il president da la Corporaziun evangelica Scuol-Tarasp, scleri l'agir da la radunanza cun ün giurist. «Il giurist ha racumandà da na trar a la radunanza üna decisiun definitiva per ün'antenna 5G. Per gnir a savair che cha la radunanza pensa davart l'antenna ha el racumandà da far üna votumaziun consultativa causa cha no vain suottascrit il contrat culla Swisscom.»

La Swisscom vaiva a seis temp fat la dumonda per installar ün'antenna 5G i'l clucher da la baselgia a Scuol. Ella vaiva stipulà ün contrat culla Corporaziun evangelica Scuol-Tarasp. Quel contrat es gnü suottascrit dal president e d'ün'ulteriura persuna ed es insè valabel. In quel contrat nu staja però scrit nüglia d'üna antenna 5G. La dumonda da fabrica al cumün da Scuol per montar l'antenna es gnüda suottascritta be dal president. Il

cumün da Scuol ha laschè sclerir ad ün giurist davart la validità da la dumonda da fabrica. «Causa cha quella cuntegna la suottascritziun be d'üna persuna nun es ella tenor statüts da la corporaziun evangelica valabla. Eir i'ls statüts da la baselgia chantunala nun es quai fixà clera- maing. Causa cha'ls statüts nu dischan nüglia davart la cumpetenza fuormala vala in quist cas il uorden superiur e quai es la ledscha chantunala superiura», ha declerà Rauch. Uschè esa da proseguir seguond la ledscha dals cumüns dal chantun Grischun chi prevezza cha per regla maina il president o la presidenta insem- bel cun ün ulteriur commember da la sup- prastanza obain cun l'actuar la suotta- scripziun legala per affars illa cumpeten- za da la supprastanza cumünala.

Il tema ha provochà grondas discussiuns

Fingì a la radunanza da preventiv dal mais da november 2019 es gnüda inzia- da la discussiun davart ün'antenna 5G. Davo cha'l contrat culla Swisscom es stat suottascrit han inoltrà divers abitants ed abitantas üna petiziun cunter quist'an- tenna. Il president ha eir survgnì diversas chartas ed ha prelet quellas. Il tema ha chaschunà üna discussiun fich animada, cun votums per part fich emozional. Ils argumaints principals cunter e per sun

gnüts remarchats i'l protocol da quella radunanza chi'd es gnü approvà da la radunanza cun ün pitschen müdamaint. Cun quai cha la dumonda da fabrica d'ei- ra suottascritta be d'üna persuna es quel- la invalida. Quist fat ha gnü a la radunanza da venderdi passà üna gronda portada in möd cha blers dals preschaints d'eiran surlevgiats. La radunanza ha lura decis da refusar l'idea da laschar installar ün'an- tenna 5G i'l clucher da la baselgia a Scuol cun gronda majorità. Ella ha dat al consistori da la corporaziun l'incumbensa da provar da's retrar dal contrat culla Swiss- com.

90 pertschient da la surfatscha da la Svizra es surtratta cun 5G

L'installaziun dad antennas 5G per üna meglra distribuziun da datas es gnüda discutada i'l ultim temp manüdamain- g ed ha pesserà per contraversas tanter ils adversaris ed ils aderents. Ils üns crajan cha sainza quella sporta nouva nun es pussibel d'inchaminar ün futur cun trametter datas amo bler plü svel- t ch'ameglrar la situaziun actuala ed ils adversaris as temman da razz chi pudessan esser nuschaivels per la sandà dad umans e bes-chas. La situaziun actuala es cha 90 pertschient da la surfatscha da la Svizra es surtratta d'üna rait da 5G e quai da la Swisscom sco eir da la Sunrise.



Il clucher a Scuol dess restar inavant sainza antenna 5G.

FOTO B. STECHER

Il cartel cuort e concis



Adam Quadroni es preschaint i'l grond cussagl d'urant la debatta chi tratta seis cas.

FOTO O. AEBLI-ITEM

DA FLURIN ANDRY / FMR

■ **In connex cul whistleblower Adam Quadroni daja ün nouv svilup. Orlando Zegg, il president dal Tribunal regiunal Engiadina Bassa Val Müstair, ha inoltrà ün plont cunter l'advocat da Quadroni pervi da pretaisas i'l film dad SRF «Der Preis der Aufrichtigkeit». Qua üna cuorta cronologia dals passa desch ons cartel, Quadroni e PUK.**

– Da l'on 2012 cumainza la Cumissiun federala da concorrenza (Cumco) ad intercurrir eventuals accordis illegals davart il predsch illa bransch da fabrica grischuna.

– Sco cha l'impressari da fabrica *Adam Quadroni* fa palais vaiva'l rendü attent fingì da l'on 2009 a rapreschantants da l'Uffizi da construcziun bassa chantunala a Cuaira chi detta in Engiadina Bassa accordis davart il predsch.

– Da l'on 2009 infuormescha Quadroni eir al capo da Scuol da quel temp, a *Jon Domenic Parolini*, davart quists accordis

illegals. Cha Quadroni nu til haja però surlaschè las cumprouvas, disch Parolini.

– Dal 2014 fa la firma Linard Quadroni SA a Ramosch fallimaint.

Adam Quadroni declera cha tuot las otras firmas in Engiadina Bassa sajan cunter el e nu til furnischan p. ex. il material da fabrica, la gera, cha l'impraisa bsögna.

– Da l'on 2017 comunichescha la Cumco cha plüssas firmas engiadinais hajan fat i'ls ons 2008 fin 2012 accordis illegals davart ils predschs e manipulà uschea la procedura da submissiun.

– L'impressari da fabrica *Roland Conrad* da Zernez e commember da la supprastanza da la Società grischuna dals impressaris constructuors conferma quel on cha quist agir d'eira d'urant blers ons pratica üsitada.

– In üna seria d'articelch rapporta il magazin online «Republik» davart il cartel in Engiadina Bassa.

– La Cumco chastia da l'on 2018 set impraisas da fabrica engiadinais cun ün import total da 7,5 milliuns francs.

– In november 2019 preschainta la cumischiun parlamentara d'inquisiziun (PUK) seis prim rapport, i'l qual el critica l'agir da la pulizia invers Quadroni. Cha'l Tribunal regiunal cul president *Orlando Zegg* haja però agi correctamaing.

– Al principi da december 2019 muossa la televisiun svizra SRF il film documentar «Der Preis der Aufrichtigkeit/Adam Quadroni's Leben nach dem Baukartell». In quel vegna pretais tanter oter cha Zegg saja intretschà i'l cartel da fabrica.

– Cuort avant Nadal 2019 inoltrescha *Not Carl* ün recuors concernent il program dad SRF, el recloma cha l'emischiun haja ferì il princip d'objectività.

– Uossa ha comunicà Orlando Zegg ch'el haja inoltrà ün plont cunter l'advocat da Quadroni causa cha las pretaisas da quel ill'emischiun dad SRF nu correspundon a la vardà e sajan ingiurias.

Reposiziunà l'aua minerala

■ **(fmr/fa) D'urant l'on 2019 ha Scuol festagià ils 650 ons daspö cha las funtanas d'aua minerala sun gnüdas manzunadas la prüma jada. Las responsablas fan uossa bilantsch.** Grazcha a las differentas funtanas d'aua minerala sül territori da Scuol e da Tarasp han turists cumanzà avant 150 ons a gnir in quista regiun. Els faivan curas da bogns e bavai- van mincha di aua minerala. Uschè sun gnüts fabricats gronds hotels a Nairs, Vulpera, Scuol ed in Val Sinestra. La prüma jada manzunadas in ün documaint sun gnüdas quistas funtanas cun «aua da sal» da l'on 1369, dimena avant 651 ons. «Cun giasts ed indigens vaina celebrà quist on da giubileum», han dit in lün- deschdi *Martina Stadler* chi maina la Turissem Engiadina Scuol Samignun Val Müstair SA ed *Yvonne Schuler*, ella ha manà il proget. «Cun festas pro'ls bügl

in tuot las fracziuns da Scuol e cun ün'ex- posiziun davart l'istorgia dal turissem da cura s'haja muossà cha las funtanas d'aua minerala sun amo adüna ün elemaint essen- zial da nossa sporta turistica», han manzunà las duos turisticas. Ün intent da quist on da giubileum d'eira da render palpabla l'aua forta cun tuot ils sens. Tenor las responsablas esa gratià da posiziu- nar meglder l'aua minerala: «I'ls ultims decennis as vaivan müdats plü e plü ils giasts illa regiun: Da quels chi gnivan a far la cura daiva adüna damain, pella pa- ja as vaiva augmentà impustüt il numer da giasts chi gnivan qua ad ir cils skis», ha dit Stadler e manzunà l'avertüra dal Bogn Engiadina Scuol dal 1993: «Il BES ha procurà per ün renaschimaint dal turissem da cura e nos on da giubileum ha trat darcheu adimaint il s-chazi natural aua forta.»



Martina Stadler, la directura da la destinaziun turistica, pro'l bügl da Bagnera cun aua forta da la funtana Sotsass.

FOTO F. ANDRY